

# Sultan Nazrin mahu IPT kekal integriti

» 4 institusi terulung dunia Islam wajar jadi teladan

Oleh Irwan Shafrizan Ismail  
irwansha@bh.com.my

Putrajaya

Sultan Perak, Sultan Nazrin Muizzuddin Shah, bertitah institusi pengajian tinggi (IPT) negara perlu diperkukuh dan dipelihara serta dikekalkan integriti, selain kebebasannya.

Namun, baginda bertitah, beberapa elemen perlu diberi penekanan termasuk mengekalkan rasa hormat terhadap tradisi dan pengetahuan lama, mengadun kecemerlangan akademik ke dalam budaya ilmiah serta menjalankan misi sosial.

Titah baginda, empat institusi terulung dunia Islam, iaitu Universiti Al-Qarawiyyin di Fez, Magribi; Universiti Al-Azhar di Kaherah, Mesir; Kolej Nizamiyyah di Wilayah Abbasiyah dan Baytul Hikmah, di Baghdad, Iraq wajar menjadi contoh di mana institusi terbabit bukan sahaja berjaya, malah bebas daripada kepentingan luar.

## Kekalkan intergriti

"Keempat-empat institusi ini di biaya menerusi sistem wakaf dan dana, dikawal oleh lembaga pemegang amanah yang melaksanakan tugas bagi mengekalkan kewujudan serta kesejahteraan institusi.

"Bagi pemimpin dan peritadbir institusi di sini, ingin beta te-



Sultan Nazrin melancarkan buku terbitan USIM pada Sidang Kemuncak Pemimpin-Pemimpin Universiti Islam Dunia 2015 di Putrajaya, semalam. (FOTO MOHD FADLI HAMZAH/BH)

gaskan bahawa kita diberi kepercayaan oleh orang ramai sebagai pemegang amanah, melaksanakan kewajipan dengan integriti dan takwa.

"Justeru, perlu ada kesedaran betapa pentingnya untuk memelihara dan mengukuhkan institusi serta mengekalkan integriti selain kebebasan mereka," titah baginda ketika menyampaikan ucapnama dalam Sidang Kemuncak Pemimpin-Pemimpin Universiti Islam Dunia (WICULS) 2015, di sini, semalam.

Turut hadir dalam program bertema Menulis Semula Naratif: Pendidikan Tinggi Untuk Abad Ke-21 ialah Felo Utama Universiti

Sains Islam Malaysia (USIM), Prof Tan Sri Dzulkifli Abdul Razak dan Felo Akademik di University Of Cambridge, Ahmad Keeler.

## Pendidikan era baharu

Ia buat julung kali menghimpunkan lebih 200 pemimpin tertinggi universiti Islam dari seluruh dunia bagi membincangkan isu dan usaha membangunkan naratif pendidikan baharu untuk mendepani cabaran pengajian tinggi global.

Sultan Nazrin turut merujuk kepada tradisi tasamuh (bertolak ansur atau berlapang dada) Universiti Al-Azhar bagi menerima sesuatu dengan ikhlas, berban-

ding sikap taksub yang dipengaruhi pemikiran fanatik peribadi, sekolah atau agama tertentu.

Titah baginda, sukar bagi seseorang yang hilang integriti untuk mendapatkan kembali kepercayaan orang ramai, sama ada dalam bidang pendidikan, pentadbiran, badan kehakiman, agensi pengawalseliaan, penguatkuasaan atau institusi raja.

"Justeru, menjadi hasrat dan harapan beta supaya pemimpin, selain pentadbir kita akan terus memperkukuhkan mutu institusi negara serta tidak membiarkan keupayaan, integriti atau kebebasannya terjejas," titah baginda.

Dalam pada itu Sultan Nazrin berharap krisis pelarian Syria yang semakin meruncing kebelakangan ini mampu ditangani dengan lebih baik oleh umat dan pemimpin negara Islam.

Baginda bertitah, sejak beberapa minggu lalu, ribuan pelarian Syria melarikan diri daripada konflik peperangan dan kemiskinan ke Eropah bagi mendapatkan perlindungan berbanding ke negara Islam lain.

"Kita seharusnya tidak lupa, ketika orang Islam di Eropah diusir ketika penaklukan di Sepanyol pada kurun ke-15, kebanyakan pelarian mendapat perlindungan di Universiti Al-Qarawiyyin, malah ada yang menyambung pelajaran situ sehingga menjadikan bandar Fez terkenal sebagai penempatan pelarian.

## Sejarah jadi teladan

"Ada pengajaran daripada sejarah lama ini kita boleh lakukan sesuatu yang lebih baik dalam situasi pelarian ketika ini. Beta amat tersentuh apabila ada pelarian Syria menyamakan Canselor Jerman, Angela Merkel dengan Raja Negus beragama Kristian di Habsyah, yang memberi perlindungan kepada pelarian Islam ketika Hijrah pertama pada zaman Rasullullah.

"Malah, memetik kata seorang pelarian Syria lain: 'Kita akan memberitahu anak-anak bahawa pelarian Syria meninggalkan negara untuk datang ke Eropah ketika Makkah dan tanah Islam adalah lebih dekat dengan mereka'.

"Beta harap umat Islam di seluruh dunia boleh melakukan sesuatu yang lebih baik bagi menangani krisis pelarian ini," titah baginda.